



UKA2020/192  
15. oktober 2020  
Sofia Geisler

**Uunga siunnersuut: Danskisut innuttaassuseqarneq pillugu inatsisip Kalaallit Nunaanni atuutilersinneqarnerat pillugu Namminersorlutik Oqartussat peqquneqarnissaannut akuerissagaat pillugu Inatsisartut aalajangiinerat.**

(Suliffeqarnermut, Ilisimatusarnermut Avatangiisinullu Naalakkersuisoq)

Danskisut innuttaassuseqarneq pillugu inatsisip 2014-imi allannguutaasa ilaat Kalaallit Nunaannut atuutsinneqanngillat, taakkuli atuutsinneqarsinnaalertarput pissutsini pisariaqartitneqartunik allannguuteqartillugu.

Paasinninnerput naapertorlugu tamannarpiaq uani saqqummiunneqartumi qitiummat, innuttaasullu Naalagaaffeqatigiinnermi inatsisitigut pisinnaatitaaffii assigiittariaqarmata, assigiissaanissaq siunertaralugu matumuuna saqqummiunneqartoq akuerivarput. Naatsumik oqaatigalugu.

Danskisut innuttaassuseqarneq pillugu inatsit Nunatsinnut atuuppoq Naalagaaffeqatigiinnermut ilaatilluta. Ulloq taanna Naalagaaffeqatigiinneq qimakkutsigu Naalagaaffinngorlutalu innuttaassuseqarnermut maleruagassanik uagut nammineq pilersitsissaagut. Naalagaaffeqatigiinnerli atuutsillugu Danskisut innuttaasuseqarneq pillugu malerugassat assigiinngitsuunissaat inissaminiinngilaq. Naalagaaffiup iluani sumiikkaluaruilluunniit inatsit assigiimmik atuutsittariaqarpoq.

Arlariinnik innuttaassuseqartitaalerneq akornatsinni ikittuararsuarnut sunniuteqassasoq ilimagivara. Kalaaleqateqarpugulli arlalinnik nunanut allanut nuussimasunik, inatsisisillu massakkutut assigiinngitsumik atuutsinneqarnera pissutigalugu taakku Danskisut innuttaassuseqarnerit annaasarpaat, nunami nuuffigisaminni innuttaassuseqarneq pissagunikku. Taakku Nunatsinnukarniarunik – soorlu qanigisaminnik napparsimasoqarnera pissutigalugu – sivilisunerusumik Nunatsinniissinnaanngillaq. Nuna allamiusut inissisimassapput sivilisunerusumillu maaniinniarunik immikkut tamanna qinnutigeqqaartariaqartarpaat, soorlu nuna allamiut kalaaliunngitsut maannarniartut taamatut pisartut.

Peqatigisaanik Nunatsinnut nuuttoqartarpoq Qallunaatut innuttaassuseqanngitsunik, maanilu najugaqarusukkaluarlutik aallaqqittartunik nunami aggerfigisaminni innuttaasuseqarnertik annaasarusunnagu, tassa Danskisut innuttaassuseqarnermi maleruagassat Nunatsinnut tunngatillugu nutarterneqarsimanginnerat pissutigalugu aporfiit pilersarmata.

Naatsumik oqaatigalugu siunnersuutigineqartoq akuerivarput, ataatsimiititaliamullu susassaqartumut ingerlateqqinneqarnissaa innersuussutigalugu.